

欽定大清會典事例

欽定大清會典事例卷三百三十六

禮部

貢舉執事員役

執事員役。順治初年定場內供應員役或有埋藏傳遞等弊。各役宜嚴選信實。司門宜改易佐貳。二年定順天鄉試外廉各官共用十六員。於八府知縣教官內科甲出身者由順天府尹行取題用。又定外廉四所書役必取土著正身以防頂替。凡卷面必印官役姓名以憑稽考。四所官皆要精明強幹。彌封官關繁尤重。當

量材授任。四所總門除送薪水一次外。皆實封。
鎮不得燕聚。提調監試輪日稽查。俟謄錄對讀
完日。方許撤封。○又定直省鄉試取醫士一名
入場聽用。○十二年定會試受卷彌封謄錄對
讀監門等官。均於內院中書科國子監光祿寺
順天府等衙門取用。其巡綽官用京衛守備千
總等弁。供給所用禮部司官。均豫行各該衙門
開送。坐名委定執事。屆期具題。十四年題准
在京貢院外間。令兵部酌撥八旗官一員。及兵
丁分與汎地。同附近貢院本旗巡街之官。晝夜

巡緝。○十五年題准。謄錄書手對讀生員。各府州縣務細加考驗。擇善書模實之人。開明籍貫。年貌如有雇替。據塞將起送之官題參。各役正身及雇替之人。皆從重究治。○十六年議准。受卷各役在京責成大興。宛平二縣在外責成。附省州縣選撥勤慎書手共十四名。造年貌籍。貢清冊。送提調官。臨期選送受卷所。令本所官細心督察。○又議准。謄錄書手行各府州縣務。令場期二十日前解送到部。該提調官按冊籍考驗。堪用者印臂留用。不堪用者駁回。將原送官

各處。書手到所之日。該所官於每十名選取總書一名。以專責成。其起送冊。應令各府州縣一樣。起送二本。一本留提調官察驗。一本付所官稽查。對讀生員。責成該學政行各學揀選年力精壯。文理通明之士。按年貌籍貫造冊。交送提調。內有點驗不對。及蒙混搪塞者。將本生黜革。開送官叅處。○康熙二年題准各省印卷收掌受卷滿封。謄錄對讀等官。以府佐貳首領並州縣正佐內。由正途出身各官選用。其巡綽。按檢。供給等官。於衛弁雜職內取用。○三年題准會

試及順天鄉試外簾各官亦照主考同考官例
通行開列密題

欽點○十八年議准。主考各帶三人。同考各帶二人。
御史各帶二人。筆帖式各帶一人。毋得逾額多
帶。進場時。御史照數按檢放入。○二十四年議
准。嗣後外簾執事官。孔氏博士不必開列。使孔
氏子孫入場。無所迴避。以示優待聖裔之意。○
三十二年議准。文武會試內收掌官。將內閣中
書中書科中書。無論俸次。儘行開列題請。○三
十九年覆准。順天鄉試內簾分卷。及印卷面號。

印交與收掌試卷官。仍用內監試御史監視。四十年覆准會試外簾例開光祿寺國子監順天府學衙門等官。恐人數太少。臨期將守部候選之內外七品官一併開列。五十二年覆准舉子進院除巡綽等官照常派出外。或參將或遊擊增派一人坐明達樓前同御史管理試畢出場。若督理不嚴。將該管官治罪。五十三年覆准鄉會試號軍。每多頂冒入場易於作弊。嗣後移咨步軍統領嚴飭該管官弁務選正軍每十名內以一人為號頭將號軍面用印記造冊。

送該管官處。如有作弊事發。將該管官弁治罪。

謹案定例。順天鄉試用號軍一千名。會試用號軍七百名。○雍正元年議准。

順天鄉試外簾官。原係調取直屬州縣。但州縣

官各有地方專責。不宜久曠職守。嗣後停其調

取。由部行文各衙門。將進士舉人出身之員外

郎。主事。中書。評事。博士。助教。守部進士舉人。並

行取。主事開列題請。○又覆准。會試外簾官。將

翰林院庶吉士。與進士出身之國子監中書科

內閣中書等官。一併開列。○六年覆准。科場對

讀。例用五等青生。惟順天除京學外。兼將外縣

新進十名以外之生員充補不得一體鄉試未免阻其上進之志嗣後照現行例概用五等生生對讀事竣准復附生如人數不足以四等生員充補其以新生充補對讀之處永行停止○七年議准號軍點進之後即於貢院內歇宿俟三場既畢令其出場○又奏准鄉會兩試外文場承辦公事五城司坊派有書役足資差遣其院書二名院阜八名甚屬無用即行裁革○又議准每翼各委賢能參領一員於貢院報門外協同點名官點名給籤並嚴行禁飭毋許送考

人等混入輶門。有混入者。該參領即行鎖拏。照擅入衙門例治罪。○又議准。考試期近。兵部咨取副都統參領旗員職名時。該旗副都統即選老成勤慎能識漢字領催五名各率至

午門恭候宣

旨。一同入場。○八年定本年

賞賜舉子料被原係體恤寒素。誠恐不肖之徒串通成衣人等。藉此夾帶。嗣後禮部派委司官筆帖式前往貢院妥協料理。○又定會試東西輶門點名給籤由順天府派員辦理。順天鄉試同○十一年

覆准會試外簾四所官照順天鄉試之例受卷
彌封謄錄對讀每所各用四人共用十六人○
又議准科場向例大興宛平兩縣縣丞在場內
辦理供給謂之內委官兩縣典史在場外督催
供給謂之外委官嗣後將內委縣丞移出一員
在場外督催供給仍將外委典史移調一員入
場內協同辦理其武場亦照文場之例○又覆
准督門官二人鄉試派用營弁會試亦不必定
用部屬照鄉試之例用千總二人督門三場畢
撤回○又奏准鄉會兩闈向來惟於點名日揭

晚日巡捕營撥兵巡守。餘日悉皆撤回。嗣後將巡捕營所派兵丁。自入閫至揭曉。統行巡緝。乾隆元年覆准。順天鄉試外簾停止開列庶吉士。其應用外簾各官於小京官及額外主事。守部進士等官內開列。○又覆准各省鄉試。於調取通省應行分房之同知通判州縣等官內。文理平常者供外場執事。如不敷用。仍調取本省佐貳差委。○又覆准鄉會場前行文步軍統領派委營弁兵丁。自入閫至出榜日。皆令於貢院周圍巡緝。仍將兵役數目。開報巡查御史。令其

稽查。如有違誤。移送步軍統領究治。○二年題准。經頭坐簿催卷。並彌封書手。必須厯科承辦之人。方不致有貽誤。嗣後伊等報明該衙門驗准。即冊發司坊官取具保結。並連名互結。屆期押送入場。○又題准鄉會試年行文直隸總督嚴飭各屬。務選信實善寫書手。押送赴京。毋得中途頂換。至京照例考驗。將能寫者仍印其左臂。臨期驗臂而入。如有串通解役。代為包攬雇覓者。查出送刑部治罪。○三年覆准順天鄉試加增謄錄二百四十名。共計千名。以敷謄錄之

用。按舊例謄錄七百六十名。均在順天一府調取。嗣後於順天額數過多之州縣內減去二百六十名。順天一府止解送五百名。其餘五百名令直隸總督照會試例。於所屬州縣內酌量地方大小。坐定名數。該府彙齊加結。先期送順天府聽用。○又覆准江甯安徽現既增額分中。其鄉試外簾增設受卷官三員。彌封官二員。○又覆准湖南外簾官共十六員。將謄錄所裁減一員。對讀所裁減二員。又山西受卷謄錄對讀三所。亦各減一員。○六年議准至公堂監察御史

隨帶筆帖式二人。業經裁汰。其內廉監察御史
隨帶筆帖二人。應一併裁汰。○又覆准順天學
政嗣後每遇鄉試之年。將通屬四五等生員照
冊開送順天府。承充對讀。仍飭各教官嚴飭各
生務於科場十日前。赴提調處會集點驗。其中
實有患病事故。必飭取該生里鄰及該教官印
甘各結。以憑稽查。如有託故不到者。本生褫革。
開送官題參議處。○八年覆准鄉試五等青生。
不敷對讀之數。兼用四等武生。免其錄遣。准入
武場鄉試。○九年奏准會試及順天鄉試均行

文兵部於報門外各添守備一員。協同點名給
籤。○又覆准嗣後順天鄉試應需謄錄書手一
千名。仍於順天府屬州縣照原例提取七百六
十名。其不敷書手二百四十名。於保定府屬之
安肅定興新城容城雄縣新安今改天津府屬
之天津易州屬之淶水等八縣內。每處提取三
十名。以足一千之數。○十二年覆准外簾各官
隨從人役各帶二人。副都統各帶三人。參領旗
員各帶二人。不得違例多帶。以滋煩擾。○又覆
准。每科主考入場點進刻匠五十二名。以供三

場刻題刷印之用。但題目刊竣以後。至於發榜以前。凡二十餘日。各匠在內。無所事事。嗣後將內簾之刻字匠。刷字匠。俱令於十六日下午盡行放出。其主考之元魁卷。俟揭曉後。交提調官在禮部衙門刊刻。○又覆准。上下江外簾受卷等所添設之五員。毋庸議減。仍照原議添設。○十三年覆准。陝西外簾官十六員。將受卷。謄錄對讀。三所各裁一員。供給官亦減二員。○十四年議准。嗣後四等文生。科舉錄遺無名。仍令送場對讀。如四等文生。五等青生。俱不敷用。以四

等武生充補。十五年議准嗣後凡考居四等生員有情願錄遺者令該教官造冊申送錄遺如取錄有名准其鄉試若未經取錄即就近令其入闈對讀至自揣難於取錄不願錄遺者即令該教官豫行查明名數造冊徑送對讀僕有不到之生將該教官查叅議處又覆准直隸鄉試對讀生如不敷用順天府添雇貧生惟四五等生員內或有老病跋涉艱難事屬可矜嗣後酌為變通除甘親身供役外果係老病四等罰贖銀四兩五等八兩令該地方官出具印結。

詳明學政。並將此罰贖銀兩。解交順天府衙門。
歸於科場項下撥用。至此等生員既准罰贖。則
對讀人數臨時儻有不敷。自應酌量充補。令順
天府於考試謄錄字畫時。兼取文義略通者。分
別記名充補對讀。所有順天府延雇貧生代充
對讀之處。永行停止。至武生劣等對讀者。均照
此辦理。○又奏准會試謄錄。向皆前期送提調
官考驗。臨時點名入場。其中多有頂替入場作
弊者。嗣後令順天府屬及直隸各府屬將應解
之謄錄生。均於三月初一初二兩日。冊送順天

府。該府尹考驗筆畫照數查收。交大興宛平兩縣擇寺觀閒屋關防。至初七日押送貢院令提調就龍門內會同監試御史覆驗筆畫一面點名一面關入外簾。知貢舉再嚴加體察如有弊端盡法處治。○又覆准雲南外簾各官受卷所賸錄所各裁汰二員彌封所對讀所收掌官各裁減一員又巡查等官共用三十五員內酌減十一員。○十七年奏准場內刻字匠仍照舊例留內關防俟揭曉之日一同放出。○十八年覆准科場承辦夫役之官往往委任夫頭以老羸

擇弱充數。不免有剋減夫價情弊。嗣後令選精壯誠實之人。如有仍雇前項不堪應用夫役。監臨官將承辦之員。立即參處。又覆准廣西鄉試舊設受卷。謄錄官各四人。各酌減二人。又奏准。鄉會兩試。於士子點名之前。先將五城三營所派坊役點入。摺檢俱不許復出。及士子摺檢入場畢。將此等人役。按照名冊點交東西朝門御史嚴加約束。不許擅自出入。○又奏准。點名執牌人役。必須官員督率。嗣後會試由禮部鄉試由順天府派員管理。○二十一年覆准向

來鄉會試外簾應行開列人員。每難足數。勢不得不用及守部之進士舉人。其實未經請練。辦理多不能妥協。嗣後守部進士舉人入簾之例。悉行停止。惟將員外主事以下。小京官以上。凡科甲出身人員。先儘開列。如不敷用。即令各衙門將恩拔副貢出身人員。揀選咨送。毋俾任意規避。○又議准剔清膳錄弊端。豫期嚴飭冊送州縣官務。選誠實正身吏役。取具親筆書迹。並冊造年貌籍貫。加印封固。慎選書吏押送至布政司順天府。以杜本地方之雇替。布政司順天

府委官驗收。驗其年貌。令其書寫字迹。查對相符。即封入公所。加謹關防。屆期委員親送入場。儻有雇替等弊。或被部院糾參。或經旁人首告。將冊送及驗收官交部嚴加議處。○又覆准各省鄉試。令該撫於出聞後。即委中軍駐宿貢院門外。以便場外巡查。○二十二年覆准。直省內簾。照京闈之例。設立內收掌官一員。於舉貢正途出身之佐貳選充。令在內簾專司收發。並於揭曉日。將落卷按數移送提調查覈。○二十五年議准。向例謄錄入場。會試於三月初七日。鄉

試於八月初七日。嗣後展期一日。均於初六日入場。以便逐細搜檢。將衣帽行李。徧行閱看。儻有潛行帶墨。致被搜出者。照科場例。從重科斷至入場後。交謄錄所官晝夜稽查。儻有一人而字迹互異。即係賄囑弊端。該所官指名呈堂。從重究治。○二十七年議准。謄錄解到時。除一切考驗關防照例辦理外。於入場前一日。提調督同大興。宛平兩縣。逐名查驗。各於左臂上用印封固。如有印文滅沒。及非原用印記等弊。查出從重治罪。○又奏准。湖廣向設外簾官十六員。

後南北分閫。中額減半。嗣後外簾員數酌減三員。○又議准各直省會城地方俱有對讀之人。歷科雇覈從未誤公。按照乾隆十五年奏准直隸四等生贖銀四兩五等八兩之例。凡應充對讀文武各生除甘自供役外。其老病者照例罰贖。惟外省雇覈稍易。量予酌減。令四等生贖銀三兩。五等生贖銀六兩。將銀解司雇覈送場對讀。各省內有以此為便者。即按照遵行。其有仍遵舊例者。聽該學政咨部存案。○又覆准對讀生係教官解送。若選充不慎。雇替充數。該員照

例參處。本身並雇替之人。照例究治。○二十八
年奏准。鄉會試外簾官。責任稽查。近日應行開
列之員。託詞規避者多。嗣後各衙門將科目出
身人。悉行開送。恭候

欽點。○又

諭據知貢舉程景伊奏。此次會試外簾官內有年老抱
病難於勝任者。派員幫辦。尚未貽誤。嗣後請令各該
堂官於開送時。將老病者驗明扣除等語。所奏亦是。
昨經侍郎錢汝誠奏。請將外簾執事各官通行開列
請點。其意原以均勞逸而杜規避。是以降旨准行。乃

各衙門堂官。並未詳加甄選。輒將衰疾之員。一概闖入。致場內另派幫辦。殊失慎重之道。且以如此易辦事件。各該堂官率略乃爾。則其平日遇事不克。因詳盡力可知。著傳旨通行申飭。向來鄉會試開送執事各官。以內簾衡文取士。視為榮選。而畏外簾之易干處分。每多卻慮。此固各官不以公務為急。惟以利己是圖。然同一承辦科場。而使執事之員妄生趨避。不若豫定章程。免致臨時遷就。嗣後應按照外簾應用人數。及各衙門員數。多寡分別定額。足敷點用。至開選時。該堂官公同驗看。不得視為具文。其科場處分。

舊例皆從嚴密者。蓋內簾去取攸關。不得不嚴設科條。以防弊竇。若外簾之受卷彌封。謄錄對讀等官。原無校閱之責。即有無心過犯。不過失察疏忽。舊例所定。動致降革。原亦未免過重。其外簾如何斟酌。平允寬嚴。適中之處。並著該部逐一分別。另行定議。具奏載入條例。永達遵行。欽此。遵

旨議定。鄉會試需用受卷官。彌封官。謄錄官。對讀官。各四員。內外收掌官二員。共十八員。嗣後開列。以三十員為率。恭請

欽派十八員。凡順天鄉試。內閣中書開送四員。吏禮

兵部四部各送二員。戶刑二部各送六員。其宗人府翰林院詹事府都察院大理寺通政司太常寺光祿寺太僕寺中書科等衙門酌擬各一員。如無合例之員。臨期由禮部行文國子監將監丞助教等官指定員數開送。以補別衙門不足之數。其會試外簾內閣中書國子監監丞等官。由舉人出身者。例得應試。未便開送。又會試係禮部專辦。所有四司官員僅數差委。不便再派外簾。嗣後於吏兵工三部各送三員。戶刑二部各送八員。共計二十五員。其餘五員於院寺

等衙門臨期通融開送。以敷三十員之額。儻實無合例人員足數。禮部隨本聲明。此內如有考過試差人員。應行扣除。並令該堂官公同驗看。詳加甄選。不得以老疾之員充數塞責。二十九年覆准貴州地處邊隅。所屬士子寒苦居多。仍照舊例將四五等生員聽其自行應役。有年老病廢者亦照往例令學書門斗代其雇覓貧生充當銀數多寡。聽本生自給不必限以定額。經該學政遇點。案冊移司覈查復點。其查點時如有讀字不真。不可供役者。仍令本生另雇承

先即將對讀生員儘數彙冊送司。如不敷用。照
例於藩司本省公費銀兩動支。○又覆准五等
武生照五等文生罰贖之例。罰贖銀六兩。解交
藩司雇覓對讀。各省一體遵行。○三十三年議
准鄉會兩試供給。俱責成大興宛平兩縣知縣
辦理。事竣由兩縣造冊報銷。其丞尉等官有代
司收發者。聽該縣自行委派。協同料理。三十
五年議准。直省外簾受卷。彌封。榜錄。對讀。四所。
事竣即陸續出閑。不俟發榜。惟收掌官係專司
試卷。不惟外簾每日進卷。俱須一一經理。即各

房考閱過落卷。亦須按號歸箱。以便出閑後給領。必當始終其事。俟揭曉後。與主考房考一同出閑。各省督撫於同知通判內。不必拘定科甲。遴調入閑辦理。其順天鄉試並會試俱照此例。○又覆准江南外簾官增至二十三員。未免浮多。照順天十八員之例。減去五員。○三十六年奏准。嗣後題請執事官。惟於清單內將各項執事應用員數分別請。

簡。其聲明某衙門應用幾員之例。並行停止。至各項執事內。有應用禮部筆帖式者。交與禮部酌量

委用。毋庸一體開列。以符體制。○又議准。捜檢
王公等進報門時。隨帶官員不得過三人。從人
不得過四名。大臣等隨帶官員不得過二人。從
人不得過三名。豫將各姓名造冊。送外場巡查。
御史臨期按名數查明放入。○四十年奏准。入
聞書手中。向有經頭名目。嗣後永行禁革。令地
方官選送誠實書手。正身入場分撥四所。每十
名內。選勤謹明白者一名。為總書。以司其事。總
於場內臨時酌定。以杜先期請託之弊。會試交
知貢舉提調。鄉試交監臨提調。同至公堂御史。

一體稽查。○又議准外省謄錄由該督撫轉飭各該州縣於保送之初詳慎考驗並嚴查有無雇替務以善寫正身書吏申送布政司衙門如有不善書寫者該督撫將起送之地方官咨部議處其中式之卷解部後磨勘官截出謄錄應議之卷禮部逐一查看除字訛句落照例查議外僅有全卷潦草不成字體者按照卷尾姓名籍貫行令該督撫查明原起送官嚴參議處○四十三年議准順天鄉試不下九千餘卷向止收掌一員嗣後照會試例再添設收掌一員○

五十二年奏准稽查龍門大臣一品者止許跟役四人。二品者三人。三品者二人。俱由瓶門御史發給腰牌放入。仍令各大臣嚴行約束。不得輒離左右。至直省鄉試監臨等在龍門親身查察。亦不得多帶跟役。五十三年奏准嗣後對讀入場。舊例給發筆硯等物。概可毋庸先發。亦毋庸散給題紙。五十四年奏准。士子於試卷本填寫通共添註塗改若干字。原以防謄錄代政情弊。嗣後鄉會試增設受卷官四員。令其親手按卷照數登記。並於簿面註明受卷官某人。

以使稽覈。

壬子科鄉試。江南浙江福建各增受卷官四員。廣東增二員。雲南增一員。

餘有照舊。○又議准嗣後鄉會試於各部院衙門經

承書吏內每處挑送六名。吏禮二部各派八名。

屆期道具花名清冊。咨送至公堂。鄉試籤掣二十四名。會試籤掣二十名。入場辦理分卷各事。宜儻非正身。嚴究懲治。並將承送之員參處。

謹案

鄉試舊用順天府治中經承。以半通舞弊。有司。茲於會試並行更定。○又議准鄉

會試榜錄。於直隸各州縣衙門正身書吏內。挑取誠實能書者。按照鄉試榜錄一千名。會試榜錄七百名之數。均勻選派。道具花名清冊。取具

印結。由直隸總督委員送交順天府。按冊點查。
照例考驗。嚴行關防。屆期。順天府會同監臨。知
貢舉等驗明印臂。押送入場。如有雇覓頂充。查
出。從重治罪。○五十五年覆准。會試受卷書吏。
照鄉試例。由知貢舉於各州縣謄錄內選充。其
縣事書役二名。仍由大興宛平二縣。造具名冊。
送部轉發提調點驗。○嘉慶四年奏准。科場巡
緝參遊守備等官。令該管衙門。將應開各員通
行開列。咨送兵部。於考官入闈之日。傳齊當堂
掣籤。派員帶領同至貢院。點名入場。不許逗遛。

具隨帶兵役亦酌定名數不許過多。八年
諭嗣後凡遇考試彈壓由該部止將副都統銜名開列
請派其隨往之參佐領等著派何旗副都統即令其
將該管旗下參佐領隨帶入場彈壓不必題派著為
令。十三年議准派送捕役各衙門務選正身充役。
於向例送造名冊之下添註年歲分送外場御
史及提調官查覈仍由提調官製造印花腰牌
彙送外場御史臨時點名給發年貌不符者嚴
行究治並將原送官查叅至每場未進士子以
前即由外場御史先將捕役照例嚴搜畢分派

各門供役。並令五城暨提督衙門於每門各派幹員一人。以資督率。捕役有意裁害者。加等治罪。該管官嚴行議處。仍不許該役等藉換班喫飯為名。違例復出。致滋流弊。○又議准。裁汰額門御史隨帶筆帖式二員。至稽查接談換卷大臣之跟役。一二品酌減為二人。三品酌減為一人。筆帖式許帶一員。由入號之巡查御史四員輪流分班。在龍門內覈對從人腰牌。儻有混入滋弊者。嚴行懲辦。○道光十三年議准。考試應用號軍。該管官查照人數。務選正軍。並造冊送

監試御史點驗入場。如有短少。將該管官叅處。
○十七年議准。嗣後三場完竣。所有留聞官吏。
均俟事竣出聞。不得告假外出。其業經出聞者。
更不准藉端復入。違者委官叅處。書吏責懲。
又議准。嗣後責成監臨。於受卷彌封完竣後飭。
令兩所人役隨同外簾官。即時出聞。毋任逗遛。
滋弊。○又議准。嗣後鄉試添派至公堂委官二
員。於試卷歸箱封鎖後。責令專司看守。○又議
准。會試照鄉試例。設外收掌一員。其至公堂添
派委官看守試卷之處。亦照鄉試一律辦理。

又議准嗣後內外廉書吏各衙門照例於經承
內挑送。造具花名冊。屆期添派司員二人管送
入場。如入場後查有頂冒等弊。除將書吏懲辦
外。並將管送之員叅處。○又議准大興宛平二
縣。係辦理場務之員。免其派送謄錄。其所缺名
數。即在順天府屬各州縣中。均匀添派。○二十
三年議准。嗣後順天鄉會試。責成順天府尹直
隸總督嚴飭各州縣。於考送謄錄時。用摺卷一
本。墨格二頁。鈐用印信。選正身書吏。於卷面當
堂親寫年貌籍貫某房書吏。再於墨格用硃寫

六行擇字畫清楚者。各於左臂用印一顆封固。
將原卷並冊結封送各府廳直隸州驗明臂印。
令於原卷用硃接寫四行。如年貌筆迹不符。即
駁回更換。將申送官詳參。其堪以供役者。派幹
練丞倅及候補州縣等員。於起解時逐一識認。
沿途約束。限於入場前五日赴順天府。將原卷
冊結投遞。驗明印臂。仍令於原卷用硃接寫四
行。如年貌筆迹不符。即駁回。查係本處頂替。或
中途更換。除將該書吏及雇倩之人嚴究外。仍
查取申送之州縣及解送官職名。分別咨部議。

處其堪以供役者。將原卷存順天府備查。由大
宛二縣各於右臂上用印一顆封固。妥擇寺觀。
同原解官嚴密關防。於入場前一日。解官押赴
貢院。輒門。按檢。大宛二縣於貢院門外點名。押
解官逐名識認。按序而入。順天府尹。會同監臨。
知貢舉。於龍門外驗明左右臂印。點名入場。
又議准。順天貢院應用水夫。令大宛二縣各雇
二十名。造具名冊。由輒門。按檢。送至公堂點驗。
再各用白布一塊。分別東西場水夫。書寫姓名。
至公堂標硃縫於各水夫衣背上。責成巡查御

史選幹練委官。東西各四員。輪流分巡。其有井
之號。毋庸編列坐號。專為約束水夫之所。委官
督令於未點名時。注滿缸水。迨封號後。再令添
注。每次注畢。即將水夫關入井號。其有東西撓
越。潛入他所者。立即嚴拏究懲。○二十六年覆
准順天鄉試外簾官各衙門開送均有定額。不
得以事繁為辭。致缺額數。○同治四年奏准川
省鄉試添設受卷官二員。彌封。謄錄。對讀官各
一員。○五年奏准廣東鄉試添設受卷。彌封。謄
錄。對讀官各一員。○六年奏准順天鄉試外簾

官遲至封門。據稱患病不克入場。行文至公堂。
令監臨於場內通融辦理。○十一年奏准福建
鄉試添設對讀官二員。○十三年議准順天鄉
試謄錄舊額一千名。除分撥受卷彌封。對讀三
所外。僅得謄錄書手八百人。近科應試人多。本
屆癸酉科鄉試添派順屬謄錄五十名。仍形迫
促。再添派直屬謄錄一百五十名。共計一千二
百名。仍遵向例由各州縣選派正身書吏。造具
冊結。屆期委員解京。一體考驗入闈。○又議准
順天鄉試定例派五營參將或遊擊一員。守備

三員會試或參將或遊擊一員。巡綽官四員隨
帶兵役入場供事。近年鄉試人數加增。原設巡
綽營員不敷照料。嗣後鄉試營員照會試例。一
律辦理。○光緒元年奏准。甘肅分閭鄉試執事
人員。照雲南貴州廣西定數派內外收掌各一
員。受卷所四員。彌封所二員。謄錄所二員。對詒
所二員。○二年

諭。鈴事中文明奏應送外簾各官請不准託故迴避
等語。嗣後各該堂官於應送外簾各員。覈實查明。
不准臨場告假。以杜規避。○五年議准順天鄉試

榜錄於正額外備送三百名。各州縣均勻選派。
照例解送考驗挑選足額。其未經入選者。交原
解員役。即日帶回。毋令逗遛滋弊。○六年議准
嗣後順天鄉試暨會試除巡邏營弁兵丁及巡
解兵丁並輦門參領守備各員酌帶兵丁。由各
該衙門照舊出派外。所有頭二三場士子進場
時。令步軍統領添派弁兵分布東西外輶門認
真查察。毋任閒人闖入。並於士子出場品閑禁
接場人等。不准擁入輶門。儻有恃衆滋鬧。及折
毀木欄登牆上屋者。立即鎖拏治罪。仍由兩翼

總兵屆期輪派一員前往督率。其派出弁兵名數先期造冊送部。轉送外場御史查察。如有違誤。及別滋事端者。移送該管官懲辦。○又議准鄉會試號軍。於點送入場日。由該管官遴派參幹營弁多員。分起押送至貢院門外。嚴行約束。督令靜候點驗。並將管送營弁職名。冊送查覈。如有擅行擁入作弊。即由監臨知貢舉將該管官及押送營弁分別參處。本軍責革。○九年奏准。嗣後順天鄉試謄錄。照新章派定。會試謄錄仍照舊定各額八百十六名。所有新添備送之

三百名。毋庸備送。○十年議准順天鄉試對謫於原設百名外添設二十名就歲科考童試府州縣考列二十名以前院試未經取進之童生年在二十歲以外者優給資用由該府廳直隸州酌量分派冊送府尹考驗文理明順入闈應差。○十一年奏准湖北鄉試謄錄對讀所官各定為四員。○又奏准山東鄉試彌封所官添設一員共用四員。○又奏准河南鄉試受卷所官添設兩員連額共六員彌封對讀所官各添設一員連額各共三員。○又奏准貴州鄉試添設

彌封官一員○又

諭烏拉布等奏職官因閱誤刻閣鈔入聞據實陳明一摺。朱宸甲聽宣錯誤。率行入聞。殊屬不合。著交部議處。監臨提調監試等官未能即時查明具奏亦難辭咎。均交部察議。十三年奏准。雲南鄉試定為受卷官四員。彌封官二員。謄錄對讀官各三員。外收掌官二員。○又奏准順天貢院增建號舍三千餘間。在東西文場之後。應需委官。由順天府查照東西文場舊額酌量添派。

欽定大清會典事例卷三百三十七

禮部

貢舉錄送鄉試一

錄送鄉試。順治二年定。順天及直省鄉試。每中式舉人一名。取應試生儒三十名。提學考試精通三場者。方准應試。不得將初學之士冒濫錄取。亦不許仕宦子弟。於父兄原任衙門移文起送。有移文起送者。監試官徑行裁革。不許入場。取送過多者。將該提學叅處。又定教官及在籍恩貢生歲貢生。監生。願就本省鄉試者。均

許與生員一體考送。卷面書官字貢字監字。另
案發落。儒士必三場悉通者方准應試。至考選
遺才。務照應取名數錄送。其假滿病痊事結未
經補考者。不得混錄。○又定在監肄業貢監生。
均聽本監官考選科舉臨場不准改名改經。其
各省貢監生就試本省者。與生員一例編號。不
得分別皿字。若直隸貢監生有仍赴學政及吏
部考送京府應試者。通編皿字號亦不許混入
生員。至直省現任教職年力精強文學優長者。
准提學考送應試。○又定生員因訟事牽告在

官候審。不係緊要對證許科場事後問理。八年題准滿洲蒙古漢軍生員開科鄉試各衙門未入流筆帖式亦同生員應試。十四年停止八旗考試。又題准各省監生係在部候選各衙門厯事及恩拔歲貢副榜官監在監者俱准科舉應試外其例監生於本年援納者不准應本年鄉試。十六年議准例監生援納在前而部文劄監於科舉年方到者仍准應試。康熙二年

論滿洲蒙古漢軍生員俱准鄉試中式者送吏部錄用。

不中者革去生員。八年題准八旗復行鄉試。滿洲蒙古編滿字號。漢軍編合字號。十四年議准本年捐納監生者。即准其本年應試。十五年停止八旗考試。十七年

諭撰文辦事中書。俱准應試。即中式仍在內閣辦事。誰

是時內閣中書尚由貢監生考授。是以仍應鄉試。二十六年奉

旨。八旗准同漢人一體考試。二十八年議准。滿洲蒙

古漢軍應鄉試之監生生員。均由兵部驗射馬步箭。能射者准其移送順天府入閣鄉試。二十九年覆准。江南浙江每中舉人一名。額定錄

科六十名應試。○又題准直省本年捐納米穀
監生皆准其於本省鄉試。○又題准奉天府滿
洲蒙古漢軍應鄉試之監生生員令奉天將軍
副都統等驗射馬步箭能射者交與該府丞分
別考取移送順天鄉試。三十年覆准江南浙
江錄科額數每中舉人一名於舊額六十名之
外加四十名。○三十二年題准各省常平倉捐
納監生遇鄉試之年亦與各項監生或在順天
或在本省一例准其鄉試。○四十一年議准鄉
試之年遇新任學政於本年到任者准將歲考

一二等生員冊送科舉以應本年鄉試仍於鄉試後補行科考。謹案此後各省學政因鄉試期近科考未編題請以歲作科者均照此例。○四十四年

諭凡南巡考取貢生監生帶來纂書者著翰林院移文咨順天府府尹一體鄉試內有生員亦准一體鄉試○又題准順天鄉試應試諸生務在場期十日以前咨送五日以前投納試卷逾限不准入場○四十七年題准國子監咨送鄉試名冊於八月初二日始到與定限十日以前例不合除將典簿官交部察議外應試士子仍據冊送試○

五十一年議准來歲二月各省

恩科鄉試其已經歲考者准其以歲作科起送入闈其未經歲考者准將前學臣科考定案名次錄送鄉試○五十三年覆准各省監生願赴京應試者於鄉試前一年起本省印文到部劄監違者照例議處○又覆准凡太醫院及各館有應舉之生監於各該管處具奏移送到日准其考試

○又

諭文武雖分兩途但文內亦有練習武略者武內亦有學問優長者嗣後不拘成例凡文生員舉人願入武

場。武生武舉願入文場。俱准照鄉會試例起送。中式者造入新冊。不中者仍入文武原冊。不准再考。○六

十年

諭。凡係奉旨應試之人。各該處具奏咨送。准其應試。其未經具奏。私行咨送者。概不許應試。○雍正元年覆准候補天文生。及補用天文生之監生生員。由該監造具年貌三代履歷籍貫經書清冊。送順天府入皿字鄉試。○六年題准外省貢監赴京闈者。親齋地方官印文。及地鄰甘結限鄉試年二月內到監。其福建。廣東。廣西。雲南。貴州。四川。

湖南諸省路途遙遠。展限兩月到監。該監驗明印甘各結。留監肄業。仍於錄科時取具同考。各生互結收考。移送順天鄉試。印甘各結雖經到監。而規避考課。並無互結者。概不准收考。七年

諭各省拔貢。聞已陸續來京。既不能應本省鄉試。則當准其應試北闈。俾得觀光盛典。凡拔貢之有貢單者。皆著該部咨送順天府。令其應試。再修書各館內。從前有外省生員在館效力者。若情願入場考試。著取同鄉京官印結。保送順天府。亦准入場。○又覆准教

官情願應試。許呈報學臣。入冊送考。儻藉應試私回鄉里者。照無故擅離職役律罰俸九月。

又議准生員科試優等。於鄉試前。州縣官設席禮送。止許諸生公服行禮。不得乘四轎張纊。違者除不准入闈外。仍發學戒飭。以杜僭濫。○又會試至由貢監生員考取小京官筆帖式之人。其中未必無通曉舉業文藝者。若因其已經得官。遂不得與於鄉試。則彼平日之所學。莫由表見。亦屬可惜。著通行八旗。凡由貢監生員考取之小京官筆帖式。若

願就鄉試。皆准其與舉子等一同入場考試。使片善
寸長。不致遺棄。以副國家教養人才之典。○八年議
准。

聖廟執事官。其由貢生監生充補。有情願鄉試者。令
其一體鄉試。若係生員童生。准作監生應試。○
十一年奏准。嗣後令各旗於考試時。將應考人
員詳晰註明滿洲漢軍。咨送順天府註冊考試。
如有漢軍冒入滿洲額內中式者。查出。將咨送
之都統佐領等官。交部議處。該員照冒籍例斥
革。○十一年題准。遇鄉試之年。除現在赴部拔

貢並保舉學習之貢監。俱由各部咨送。及從前已有地方官印結。現在肄業之監生。由國子監錄送外。其餘貢監生在京鄉試者。俱照定例。取具各本籍地方官文結。地鄰甘結。親身到監驗照。按季考課至錄科時。仍取同考五人互結。儻有規避考課。及無本籍文結與五人互結者。不准收考。並令順天府五城先期出示曉諭。嚴行稽查。如有借照頂名入場之弊。除本身治罪外。仍將出結之地方官。互結之各生。題叅議處。國子監官不行查明。嚴加議處。其混送入場之蠹。

吏交部嚴行治罪。○十三年議覆貴州學政奏
請土司准其鄉試一摺奉

旨。土司龍紹儉原由生員出身。既有志觀光陳請科舉。
著准其一體應試。○乾隆元年

諭。凡由捐納候選之貢監舉人例不得與鄉會試。從前
事例內有捐應鄉會試一款。今捐例已概停止。此等
貢監舉人有志科名者。勢皆不得援例與試矣。朕思
此等人員尚在需次選曹。與既登仕籍者有間。不得
因捐資候選。屏諸場屋之外。直隸各省貢監生捐官
願與鄉試舉人捐官願與會試者。准令一同考試。以

示鼓舞人材之意。○又議准在京新捐貢監若係臨場期迫本籍遙遠實難取本地方文結者准其取具同鄉六品以上京官印結並取同考五人互結錄科送考如有頂冒情弊將本身及出結互結之京官貢監一併照例治罪○又議准貢監生久寓京師覓館授徒勢難回籍起文而上科曾有文結應過鄉試者取具同鄉京官印結錄送○又覆准廣西土司徐國丞由生員承襲土職貴州土司安守仁土主薄楊世正均由廩生承襲土職俱援照龍紹儉之例一體鄉試○

又議准各省薦舉博學鴻詞科。有由生員舉報
到京者。一體應順天鄉試。○六年奏准各省拔
貢來京。照雍正七年之例。驗明貢單。一體咨送
順天鄉試。○七年

諭各省應試生員貢監。由學臣錄送入場。向例舉人一
名。額取科舉三十名。嗣後加至百名。不為不多矣。乃
學臣等博寬大之名。於科舉之外。遺才大收。一概錄
送。且有督撫普收送考者。以致文理荒疏之人。亦得
濫冒入場。試卷太多。不但試官於倉猝之中。難於別
擇。即浮薄士子。將以觀光為遊戲。不復攻苦於寒窗。

於賓興大典。甚有關繫。嗣後學臣各宜留心慎重辦理。毋得濫溢。永著為例。○又議准文武互試。原欲簡拔全才。而日久弊生。文場則有夾帶傳遞。代做諸弊。武場則有換卷之弊。內簾但憑文取中。外簾又查察維艱。嗣後將文武鄉會互試之處。永行停止。○八年覆准臺灣孤懸海外。向來額中舉人二名。錄送鄉試者約五百人。今遵定額止送二百名。即應裁減過半。恐無以鼓勵邊遠士子之心。嗣後許學臣將依額錄送之例。少加變通。於二百名外。再擇文理清通者。酌量增加。但

不得將文理荒疏之人。普收送考。其內地錄科。
不得援此為例。○九年

諭科場乃國家大典。必期選拔真才。以收實用。積習相沿。學臣於科舉之外。復有錄遺大收等事。臨場之際。督撫大吏。又將不取者。不問文藝之優劣。盡送入場。濫觴已極。是以上科經臣工條奏。朕敕令九卿定議。每舉人一名。准取科舉百名。此亦不為不多矣。夫國家所以慎重科舉者。原欲士子奮力於學業。試官盡心於蒐羅。以副掄才之典也。今科臣吳煒乃請仍照舊例。並蓄廣收。則士子見入場之易。不肯專心學問。

將應試者日益眾多。主考房官不過一二十人為期
不過二三十日。豈能精心校閱。盡得真才。且試卷既
多。而中額不廣。則多取科舉。仍屬無益。若因此而議
加中額。則現在舉人。非二三十年不得官。亦斷無因
候選者多。而議增天下職官之理。不幾終身無仕進
之日乎。所謂及鋒而用者何居。是中額尚應酌減。即
科舉一百。亦屬浮多。止因積習既久。不復議裁。朕方
自咎不免姑息。而況可輾轉增添。無所限極耶。此輩
非能為國家實心求賢以佐國是。不過取悅士類。釣
譽沽名。動以人文目盛為辭。實則使士子徒懷傲幸。

之心不肯追勉向學。而國家亦不得收登進之實效也。吳煥識見卑淺。特行曉諭。並使眾知之。○又議准直隸。江南。江西。福建。浙江。湖廣為大省。准其每舉人一名。錄送科舉八十名。山東。山西。河南。陝西。四川。廣東為中省。每舉人一名。錄送科舉六十名。廣西。雲南。貴州等為小省。每舉人一名。錄送科舉五十名。其順天鄉試滿合夾旦南北中皿等字號應試人數雖屬無多。亦必精通三場者。方准錄送。嗣後即應試人衆仍不得過八十分之額。○又議准。錄科定例。一二等生員並三

等之前五名或前十名准其科舉嗣後應令學政於錄科時酌量文風盛者一二等名數從多未盛者一二等名數從少其三等前列者仍照例酌送至因事故未與科考及科考未取者原有錄遺之例亦應視其文風之高下中數之多寡通盤計算慎選錄送○又議准臨場捐監未獲部照者該州縣出具印結申文發給本生並親齋實收赴布政司衙門覈實轉送學臣考錄一體鄉試謹案此例乾隆十二年停止○又議准八旗鄉試禮部先期行文各旗將應考生監造冊送部即

咨送兵部考試馬步箭。合式者造冊劄發順天府。仍一面行文學政傳令八旗生員科考及錄選並行文國子監傳令八旗貢監一體錄科。皆憑文錄取造冊移送順天府。該府尹查明科冊箭冊俱有名者方准入場。如科冊有名而箭冊無名或箭冊有名而科冊無名俱不准應試。○又議准凡孝廉方正給以頂戴榮身願應鄉試者本係生員仍由教官申送錄科。本係貢監仍由州縣申送錄科。○又奏准粵東通省額中舉人七十八名。其廣南韶惠潮五府連嘉二州文

風稍優。每科獲中六十餘名。至肇高雷廉瓊五府羅定一州。文風稍次。每科僅中十一名。至五六名不等。酌定錄送遺才科舉。廣韶學臣以五千二百名為率。肇高學臣以二千六百名為率。○十二年覆准順天鄉試。貞字號科舉。照山東省例。每舉人一名。錄送科舉六十名。○又覆准八旗現任小京官筆帖式及在部候選人員。凡由貢監出身者。由國子監一體錄科。由生員出身者。仍赴學政衙門錄科。○又議准各省貢監生有願就本省鄉試者。該學政錄科時。務憑

文字與生員通較工拙。以定去取。照例送試。其南北中皿等字號貢監。應令監臣於錄科時。遵照定例。嚴加考試。不得濫行錄取。○十三年

諭科舉定額。每舉人一名。大省錄取八十名。中省六十名。小省五十名。其途本寬。果係真才。自不復有遺珠之歎。但近來士子。因科場剔除舊習。頗知自愛。有志讀書。期以實應。又當稍展其額。以示鼓舞作興之意。前議但就正榜定額。尚有副榜未經議及。著再加恩。每副榜一名。大省加取四十名。中省加取三十名。小省加取二十名。今各學政於考試遺才時。不論生員。

貢監亦不拘縣分大小。但就文理明通者。照數錄送入場。此外不許濫送。十四年議准嗣後應令學臣於錄遺定額之外。查照厯年投卷不到之數。酌量錄取備補若干名。行令各該提調查照。於八月初二日投卷既齊以後。將原額所缺之數。按照備取名次抵補。其抵補不盡者。仍行扣除。不准投卷入場。十五年覆准。凡生員歲考四等。有情願錄遺者。該學教官毋得任意勒捐。不為申送。錄取有名。一體鄉試若確詢該生係本不願錄遺者。該教官即造冊徑送對讀。儻業經造

冊申送對讀。而該員又捏稱情願錄遺避匿不到者。除將該生照例究懲。該教官一併叅處。

十六年

論山西布政使多綸奏請暫寬科舉之額。所見極為舛謬。科舉分別省分。計取中之額以為額。其數已寬。學臣照額錄送。尚恐未必無倖邀備數之輩。若更加濫取。徒啟荒陋者倖進之念。轉使砥玉雜清耗。主司目力而眩。裁鑑於遴選真才培養實學之道。實無裨益。前者鄂敏曾為此奏。朕以其沽名博士子稱頃嚴飭批示。但或出於一己之見。是以未經傳諭中外。今多

綸亦為此言。當由聽幕賓怨懣抑或士子有此妄想故相傳播以致聽採入告均未可定以科舉而論中額有定千人應試與萬人應試所中止有此數有何加損何惜令其一體入闈但試問其一體入闈者為名乎為實乎違道干譽棄實務名之事朕所不為况今特開恩科士子羣叨格外盛典乃欲因此更思濫冒則得隴望蜀其不知足亦已甚矣此所關於風俗人心者甚大不可不為明切曉諭今天下士子知之

謹案鄧敏是年奉旨更名鄧樂舜○又

諭鄂樂舜前奏量加科舉一摺以其聽幕賓怨懣博士

予稱譽。意在好名。批示使知所改。後多綸亦為此奏。
因一併宣示。今鄂樂婢接到硃批。旋具摺陳辯。且稱
年老孤寒。僕僕省會。錄科見遺。無不嘵嘵呼籲。思欲
推廣皇仁。此語甚謬。省試之中額有定。而求中之人
無窮。得者之喜。不敵不得者之怨。為政之體。惟論掄
才之當否。若憫其見遺。且欲慰其呼籲。將必來者盡
令人彀而後可。有是理乎。朕訓示臣工。隨事教導。無
非成全之意。為臣子者。有則改之。無則加勉。惟自問
諸心可耳。○又議准明歲壬申。

皇太后萬壽

特開恩科。各省貢監在京應過乾隆十五年鄉試。曾投文結。有案可稽。准其取具同鄉京官印結收錄。至有依親覓館。去本籍遙遠者。即於所在地方官取具文結。亦准收錄。若在京新捐各生。係十五年報捐者。已越二年。不難取具地方官文結送試。惟十六年新捐之生。若令回籍起文。往返難及。亦准其取具同鄉京官印結收錄。○又議准在浙報捐之本省及江南江西生俊。准以實收應明年鄉試。本省將實收呈明該學政順天將實收呈明國子監查驗。○又覆准繕譯生員。

應文鄉試。應令該旗自行造冊。徑送順天學政錄科。○又議准監臣學臣咨送鄉試名冊。遵例於場期前月二十七日送齊。如逾限續送。一面駁回。一面將咨送各員奏請交部議處。○又奏准來歲壬申舉行。

皇太后萬壽恩科。應試士子由國子監順天學政錄送。定例場期十日前送冊。五日前納卷。嗣每任意逾期。況來歲鄉試外省於二月舉行。順天府於三月舉行。不特山東山西河南貢監於本省出場後可以趕赴京闈。即江南江西浙江陝西等

省亦得兼程進京。重疊應試。請飭監臣學臣務於場期前月二十七日前彙送冊卷。並飭國子監示諭江浙等省士子。務於二月二十日前到監錄科。○二十年

諭明歲江省報捐生俊。有願應試者。若必咨部換照。方准入場。往返動需經月。恐阻士子觀光之志。著照乾隆十六年浙省事例。准以實收應南北鄉試。其各省赴江報捐者。亦著照此例行。○又議准舉子丁憂。臨場服滿。但取具同鄉官印結。舉人既准會試貢監。即准順天鄉試。○二十一年覆准欽天監天

文生由生員入監肄習者該監將年貌籍貫造具清冊送禮部存案屆期鄉試移送學政錄科學政移查禮部與原冊覈對相符方准考錄應試再入監人員從前但憑同鄉官印結收錄並不考試其人之可否造就無從鑒別嗣後額缺需人應由監奏明嚴行考試試其術業可以造就者酌取數名依次充補仍將考取人數造冊送部存覈其由生員考取未經補額之先該監不得移送科舉○又覆准各寺院效力生員逢鄉試之年有由該管衙門咨送學臣者學臣仍

分款咨送。但須將科考之冊。彼此互對。不得重複開送。○又覆准順天錄遺之貢監生員。學政務與正案一體詳造年貌籍貫全冊咨送。以便監試按冊查覈。○又議准。

關里

崇聖祠向由衍聖公委曲阜縣世職知縣致祭。今改為世襲六品官。令專主

崇聖祠祀事。歲支俸銀二十兩。其官與執事官相同。如係進士舉人。遇原職輪班應選者。聽其就選赴任。其由貢生生員補授。有願鄉試者。令其

一體鄉試○二十四年

諭據禮部奏請八旗有現任三品以上大臣子孫及親兄弟之子可否令其入場鄉試一摺甚屬有意蒙混前因八旗童生入場滋事風尚澆漓在平日既不專務八旗濫模舊俗而徒博取虛名且流為舞弊惡習不得不力為整頓是以令伊等自行奏明必其國語騎射皆有可觀方准考試童生如此鄉試又何待言乃立法伊始而本人並不自奏即冊送禮部禮部亦即含混具請希圖傲幸是誠何心若謂前旨專屬童生而言則生員已經考試童生且不具論其貢監一

途人人可捐。若不須陳奏。是童生不得應小試。轉可避而應鄉試矣。有是理耶。伍齡安等自問能登答此旨乎。其中係何情由。著即明白回奏。仍將冊內開途應考十餘人之父兄。一一查明具奏。並令在京總理事務王大臣傳齊伊等。令看此旨。皆令其自行明白回奏。朕法在必行。毋謂小小伎倆。可以嘗試也。○又上年降旨令八旗三品以上大臣有子弟應試者。自行奏明方准入闈。特因旗童在場喧鬨滋事。是以爲伊父兄示之節制。俾知崇實黜浮。破除積習。非概從禁止。遏其進取之途也。乃今年鄉試屆期。伊等既不

論

遵旨自奏。禮部又為含糊具請。似此巧為嘗試。將使
故智益萌。伊於胡底。我八旗滿漢素風。嫋國語。習騎
射。其人果有足錄。均可量能擢用。若科目者。特備儲
材一格耳。今乃豔心詭遇。又從而釣弋其名。淵藪其
弊。是以國家啟迪後生之途。轉為蠹壞人材之具可
乎。且我朝開國以來。名臣碩輔。莫不志秉忠忱。才優
韜略。初非從事佔畢者。即仕躋大僚。內而大學士尚
書。外而總督巡撫。勳名氣節。指不勝屈。大約皆非出
於甲乙兩榜。即近時大臣在科第中有名者。不過如
鄂爾泰尹繼善一二而已。然其見用。實因其心地

材幹初不以其文也。其他倖列科名而名實不副者。亦指不勝屈。若奉寬國柱者流以滿洲本色論之。皆不能至驍騎校者。而乃託名斯文。平日又不肯潛心力學。惟事希心襲取。視為功名捷徑。甚至懷挾夾帶。無弊不作。即立法嚴行搜檢。而所派大臣。非親即故。俗稱官官相護。亦復有名無實。此所關於風俗人心者甚鉅。朕安得不力為振刷。以挽頽風。伊等至此尚不思痛自湔改。一似竄身入闈。即可徼幸萬一。勢必欲朕盡停旗人鄉會試而後已乎。所有禮部單開不循例自奏。遂任子弟冊送考試之尹繼善等。著將該

部及該旗曾否鈔錄前奉諭旨。行文知會伊等之處。
令該部旗及伊等本人據實明白回奏。再行降旨。至
僧保住福延乃係內務府人員。進身豈患無階。而亦
令子弟驚名科舉。又顯違旨不奏。尤為庸妄。著將僧
保住福延革職並將伊子弟革去生監。在內務府庫
使筆帖式上效力行走。不准給俸。俟五年無過。該管
官奏明另請挑差。其蒙混奏請之禮部堂官伍齡安
等。著交部嚴察議處。○又

諭。今歲鄉試屆期。三品以上大臣子弟內有未經遵例
陳奏。遽行送考者。經朕降旨。令該旗及本人明白回

奏。今據鑲黃正白正紅鑲藍滿洲正藍滿洲蒙古等六旗覆奏。以現在送考之人。其父兄或在軍前。或係外任。俱未在京等語。去歲此旨。雖經該部俱已行文。然此內如永貴阿桂清馥等。現在軍營辦事。無論伊等子弟在京應試與否。無由而知。即知之亦何暇陳奏。此在該旗本應奏聞之事。若外省督撫安居無事。先期自行陳奏為是。然伊等並未令子弟往考。則不奏亦未為過。而該旗何以仍將名冊咨送禮部。是該旗明係瞻徇。而又執例推諉。均與不奏之本人無涉。前已將蒙混請旨之禮部堂官等。交部嚴加察議。所

有瞻徇推諉之鑲黃等旗管旗王大臣等著一併交
部嚴行察議並將此通行曉諭八旗知之。三十年
諭前經降旨八旗三品以上大臣子弟果有嫾熟國語
練習弓馬者遇考試之期奏明准其入闈原因八旗
濫模素風近來未免沾染虛浮豔心詭遇是以示之
節制俾知崇實黜華非概從禁制遏其進取之途也。
乃適年來八旗大臣竟無奏請子弟應試者未免多
生顧慮因噎廢食伊等既不潛心力學而於國語騎
射又未見專攻嫾習出色自不如兼收並進猶可為
造就之資也我國家滿洲世臣宣力贊政原不藉文

章一途。但承平百餘年。滿洲詞臣文藻穀飾。亦不可少。大臣子弟中。延請師資。擴充聞見。較之寒素之家。成材自易。嗣後八旗大臣子弟。仍准一體考試。毋庸奏明。請旨。儻伊等仍不以實學就考。如前懷挾。或進身之後。仍蹈虛名陋習。無裨實用。又何難隨時懲治。俾知所儆惕乎。○又議准順天生員赴羅試者。令該生先期報明該學。查無事故。與起送之例相符。該學總造年貌清冊。備文呈送學政。學政考錄後。將名冊知照順天府投卷。其給文驗文之煩。概行停止。○三十二年。

諭據阿桂奏稱准京城鑲黃旗漢軍正紅旗滿洲等旗
咨稱明歲戊子科鄉試伊犁有無貢監生員應考。著
咨報國子監並造清漢冊咨報各該旗查該處並無
學習漢文之人。請嗣後母庸咨取等語。伊犁係新定
疆域雖移駐滿洲蒙古官兵究非內地駐防可比。該
處人等止宜勤習清語騎射學漢文何為。況道途遙
遠不惟鄉試不應咨取即遇考試清文亦不准行查。
此次冒昧咨取之都統實屬不曉事體著查明何旗
行文令該旗明白回奏。○又奏准每屆鄉試國子監
咨取八旗應考由旗轉行各省駐防將應試各

生送監錄科。俱覆稱並無應考者。往返行文。徒滋煩擾。應即停止。○三十四年復准嗣後鄉試之年。各省學政造送錄科錄遺等冊。均照順天之例。將年貌籍貫經書註明。移送布政使司。交收卷官。於投卷時詳加覈對。儻有不符。不准收卷。仍將底冊移送提調監試等官查覈。○三十八年議准。兵丁取進武生。應一體由學臣考試。分別錄送入闈。不必另立兵丁鄉試名目。以致科條歧異。○四十四年議准。在京候補候選人員。由吏部據呈送部。行國子監錄科。其現任小

京官由本衙門送部。徑行冊送順天府。若在部行走。仍係候補之員。應照例由監錄科。○又奏准。四庫全書處。騰錄內。有前由寄籍順天入學。旋經遵例改歸原籍。並有由

召試二等在館行走各生。以在館騰錄。不能回籍應試。俱呈請就近在順天鄉試。應准其按照省分歸於南北中皿字號。照例由本館送監錄科鄉試。○五十年議准。順天府樂舞生。准令生員兼充。如有科考列在三等者。免其錄遣。一體鄉試。○五十二年議准。正途貢監。令該監照例收考。分

別去取。一經被遺。不准復行考試。至由俊秀捐納貢監者。無論小京官及官卷旗卷民卷。皆應從嚴甄錄。屆期奏請。

欽派大臣秉公考試。仍派滿漢御史監查。以昭嚴密。
○五十四年議准。順天鄉試生員。令直隸總督飭每府各派教官二員。帶同該學書役。屆期到京識認。其國子監肄業貢監生。令助教等官識認。其不在監肄業。雖起有本省咨文。仍取具同鄉官印結。今出結官識認。至在部候選及在館謄錄。由各衙門咨送者。亦令取同鄉官印結識。

認。五十六年奏准俊秀貢監錄科。俱於七月二十日以前取齊。即於二十三日考試。奏請欽派大臣閱卷錄取。交監照數送場。○又覆准難磨八品監生。如有弓馬素未嫻習。願入文闈者。由該督撫咨請到部。准其應文闈鄉試。○五十七年覆准順天鄉試。各部院小京官係現任人員。與候選者有閒業。由該衙門咨送。毋庸復取臨場識認印結。○又覆准難磨承襲恩騎尉世職。投標學習尚未期滿補缺之文生員。因弓馬未能嫓熟。呈請應文闈鄉試者。一體入文闈鄉試。

○五十八年議准乾隆五十九年秋及六十年

秘欽奉

諭旨特開鄉試

恩科通行各該學政所有五十九年凡歲試已竣未經
科考之府州縣學准其以歲作科照例起送入
闈其六十年

恩科鄉試照依科考等第起送入闈○又覆准吉林所
屬應試生員交奉天府丞將吉林教官一員與
奉天合屬教官八員輪流派委其不派委之年
有應試生員該學照例慎選書役移送派出之

教官帶同來京臨場識認。如該學無應試者。毋庸派委。○六十年覆准直隸承德府教撫每年經理

文廟秋祭不能遠離。准選派門斗書吏各一名。移交順天府北路廳屬。由廳屬所派辦送鄉試之教官。帶京識認。